

## Nastavlja se potraga za dječakom, porodica sumnja da je zatrpan pijeskom na ušću u Bosnu



Mještani Begovog Hana potpomognuti spasilačkim ekipama i danas će pretraživati korito Bosne s ciljem pronalaska 6-godišnjeg dječaka koji je prije dva dana upao u nabujali potok.

Treći dan potrage za dječakom koji je nesretnim slučajem upao u potok počeo će okupljanjem ekipa Gorske službe spašavanja iz Žepča, Zavidovića, kao i drugih spasilačkih ekipa koje će i danas pretraživati obale rijeke Bosne.

U izjavi za Klix.ba Toni Matijević iz GSS Žepče je kazao da će ekipa iz Zavidovića i danas čamcem proći korito Bosne prema Žepču, a na ušću će koristiti mehanizaciju.

Dječakov amidža jučer je kazao kako porodica sumnja da se dječak nalazi ispod velike količine pijeska na ušću potoka u Bosnu, a da taj pijesak inače nije bio tu te da će mehanizacija otkloniti i tu sumnju.

Očekuje se i dolazak spasilačkih ekipa iz Zenice, kao i pripadnika Kantonalne i Federalne uprave civilne zaštite koji su teren jučer pretraživali na obalama i koristeći dronove kako bi analizirali snimke. (klix)

Date: 16-05-2019